

## Scuele: a cressin lis adesions ae lenghe furlane

Intes scuelis de infanzie e intes primariis si è passâts dal 76% al 80%

La istruzion e je un dai ponts centrâi dal “Plan gjenerâl di politiche linguistiche pe lenghe furlane 2021-2025” fat bon de Regjon daûr de propueste de ARLeF. Fra i trê macro obietîfs fissâts dal Plan al è di fat chel di garantî l’aprendiment de lenghe furlane a scuele, e i numars des adesions di bande dai gjenitôr nus disin che la plui part dai Furlans lu condivît.

A marcâ la impuartance de situazion che nus piturin i dâts dal Uffici scolastic dal Friûl – Vignesie Julie al è stât il president de ARLeF – Agenzie Regjonâl pe lenghe Furlane, Eros Cisilino. «Stant a ce che al ven fûr dai dâts cjapâts sù – al à comentât – i gjenitôrs che a sielzin di aderî, pai lôr fîs, al insegnament de lenghe e de culture furlane a scuele al è in cressite costante. Al è un dât che si à di lei ancje ae lûs di un altri fat, che nol è par nuie relatîf: la flession dai iscrits. O ringracii duncje dut il mont de scuele. Prime fra ducj, la assessore regjonâl ae Istruzion, Alessia Rosolen, e il diretôr gjenerâl deUSR, Daniela Beltrame, pal sfuarç costant fat par garantî la presince dal furlan a scuele. Lis ultimis criticitâts, peadis ae dificolât di cjatâ insegnants, cumò a son stadis superadis cu la aprovazion des gnovis normis regjonâls che a permetin di doprâ lis MAD ancje pes oris di furlan. Ancje la ARLeF – al à zontât Cisilino – e je daûr a fâ la sô part, so redut tal meti a disposizion materiâi e struments didactics pai insegnants. Si à di dâ propit a chescj ultins il merit dai numars cussì bogns tes iscrizions: a son lôr, di fat, che ogni dì a fasin in maniere che la lenghe e sedi trasmetude, lenghe che dut cês e à sigûr di cjatâ inte famee il so prin lûc di incuintri, ma cence fal la scuele e à di jessi la situazion là che chest patrimoni al à di jessi aprofondît e fat diventâ un patrimoni culturâl par dute la comunitât».

Cjalant i dâts, al ven fûr cemût che tal cês de scuele de infanzie e de primarie, i arlêfs a son passâts dai 39.267 dal an scolastic 2019-2020 ai 33.893 dal 2021-2022, cuntune incressite percentuâl sensible di scuclârs che si zovin des lezioni di furlan. Se tal 2019-2020 o jerin al 76%, tal an presint si fevele dal 80%, o ben di 27.139 frutis e fruts che a studiin la lenghe furlane a scuele.

Te secundarie di 1<sup>n</sup> grât, là che doi agns indaûr lis adesions si fermavin al 45%, si è passâts al 50%. La situazion e je duncje simile a chê descrite parsore: suntun totâl di 15.338 arlêfs (rivant dai 16.387 dal 2019-20), 7.718 a frequentin lis lezioni di furlan. Fasint une analisi de situazion intal so complès – metint adun sedi i dâts de scuele de infanzie e de primarie cun chei de secundarie di prin grât – si viôt ben che tal an scolastic daûr a sierâsi a son 34.857 lis arlevis e i arlêfs che i lôr gjenitôrs a àn sielzût il furlan. In percentuâl o rivin al 70% dal totâl, o ben a 49.231. Doi agns indaûr, cuant che i arlêfs a jerin 55.654, a vevin sielt di zovâsi des lezioni di lenghe e culture furlane 37.327, o ben il 67%.

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<<

La cussience dai gjenitôrs sui vantaçs di une formazion plurilengâl e je daûr a madressi an par an e e je cressude in maniere sigure e evidente di cuant che, tal 2001, l'Ufici scolastic regjonâl al à inviât pe prime volte l'insegnament de nestre marilenghe tes scuelis, metint in vore la normative statâl di tutele (leç 482 dal '99). Cheste sielte e à cjàpât fuarce ancje in graciis des tantis ricercjis scientifichis di nivel internazionâl, in particolâr de Universitât di Edimburc, che a mostrin cemût che il plurilinguism al judi l'aprendiment di altris lenghis, tant che l'inglês, o di altre materiis, par esempi la matematiche. Dut chest, cence tignî cont che e cres ancje la creativitât, la velocitât e la capacitât di comprension, di adatament e il jessi vierts cun chei altris. «Chel furlan al è un patrimoni culturâl unic che o vin di prudelâ – al à ancje ricuardât Cisilino – e un dai struments plui impuartants par fâlu al è propit l'insegnament de nestre lenghe ai plui piçui, che a son il nestri avignî e chel de lenghe stesse».

Udin, ai 12 di Mai dal 2022

#### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<